

Segun abogado Lincoln D. Gomez:

Tanto gobierno como AWSS ta evita tuma responsabilidad den e “saga” di RWZI

E crisis di awa di riool andando na e facilidad di RWZI Bubali Plas na Aruba ta sigui bira mas complica sin un resolucion den bista, asina e abogado Lincoln D. Gomez a indica despues cu diabierna ultimo e tabata presente na e ultimo audiencia di corte tocante e caso aki. E abogado, ken no tabata fungi como abogado pa ningun partido, ta sigui e caso aki di cerca y ta informa tocante e ultimo acontecimentonan for di su punto di bista como experto den ley.

Den su ultimo publicacion Gomez ta elabora cu den e “saga” aki tin un tema cu a surgi, cual ta e falta boluntad di actornan clave, den a caso aki Gobierno demisionario di Aruba y AWSS cu den luna di juli a tuma over e maneho di e facilidadnan di RWZI, pa acepta responsabilidad den e caso. El a destaca cu enbes di tuma responsabilidad nan ta enfoca riba evita responsabilidad y tene e “comunidad afecta den limbo.”

Segun e abogado, e audiencia recién den corte a agrega mas capa na e complejidad di e situacion, ya cu e hotel Amsterdam Manor Beach Resort, Gobierno di Aruba, y AWSS cada un a defende nan postura, pero a pesar di argumentonan nobo y solucionnan proponi, el a resalta, e asunto fundamental di responsabilidad a keda mesun scur cu nunca.

Gomez a splica cu na comienso di e tratamiento, hues a sugeri pa tur partido considera intermediacion. Considerando e cantidad di caso- y apelacionnan sin resolve, corte a reconoce cu mediacion por yuda resolve asuntonan di hopi tempo, incluyendo castigo, demandanan di daño y maneho continuo.

El a agrega cu sinembargo, e contesta lauwer di e partidonan tabata señala na cu nan ta parce renuente pa sigui colabora, señalando un preferencia pa batayan legal largo en bes di soluciona e problema colectivo

E abogado a indica cu e evasion di responsabilidad ta refleta loke a ser mira repetidamente durante henter e saga aki. For di e nengamentonan anterior di gobierno pa aborda di un manera significante e kehonan di e resort, te na e duda di



AWSS pa actua di forma decisivo, el a subraya cu e falta di responsabilidad ta un característica definitivo di e crisis.

Gomez a sigui splica cu e abogado representando gobierno a argumenta cu for di 1 di juli 2024, Gobierno di Aruba a absolve su mes di responsabilidad pa e facilidad di RWZI Bubali Plas. El a señala cu gobierno a pretende cu door di crea AWSS y traspasa e tareanan operacional, cu nan no ta carga ningun responsabilidad mas.

“E cambio aki no a bin como un sorpresa; den “Crappy Legislation: How Proposed Law Could Flush Away Aruba’s Future”, mi a explora e strategia nan legal cu Gobierno di Aruba a usa pa desvia culpa, permitiendone esaki distancia su mes for di e asuntonan creciente di

e facilidad,” Gomez a indica.

El a splica cu AWSS su posicion, sinembargo, tabata igualmente evasivo. Representantenan di e compania a afirma cu nan tabatin autoridad limita, recursonan insuficiente y falta di respaldo legislativo pa atende cu e problema completamente. E posicion aki, e abogado ta señala, esencialmente a laga e asunto sin ser atendi, cu AWSS fungiendo como un “buffer” cu ta permiti gobierno distancia su mes mas for di e situacion.

Abogado Gomez ta resalta cu un momento notabel durante e audiencia tabata e afirmacion di AWSS cu e tin plan pa implementa tecnologia di reduccion di holor cu supuestamente ta ser usa den otro partinan di mundo. El a sigui splica cu ora u hues a pone presion riba dje,

e representante di e compania a contesta vagamente, “Bo por Google e,” loke ta lanta duda tocante e confiabilidad y aplicabilidad di e tecnologia pa e condicionnan unico di Aruba.

“E momento aki a trece na mente e promesanan kibra di solucionnan tecnologico anterior, manera mi a discuti den “Aruba’s Sewage Crisis: The Dutch Way Forward” of e planta infame na Parkietenbos cu tabata suppose di converti sushi den fluff - pero nunca realmente a cumpli cu e promesa aki. Publico a ser bisa repetidamente cu sistema- of metodonan nobo lo resolve e asunto - solamente pa keda decepciona,” el a enfatisa.

Gomez ta remarca cu for di e falta di accion inicial di parti di gobierno te na e desviacionnan di AWSS, e asunto a persisti sin resolucion, impactando turismo, e pilar economico di Aruba, salud publico y medio ambiente di e isla.

Anteriormente e abogado a explora e origen di e crisis y su impacto riba comunidannan local, for di e holor insoportabel cu ta afecta turismo te na e riesgonan di salud pa e residentenan. El a resalta cu a pesar di e riesgonan severo, e renuencia di gobierno pa acepta responsabilidad a pone pueblo di Aruba warda riba cambio significativo.

Abogado Gomez a señala cu mientras cu gran parti di e enfoca tabata riba e bataya di Amsterdam Manor Beach Resort contra gobierno, e esfuersonan di Jurgen van Schaijk ta digno

di reconocimiento. “Como e lider tras di e resort, el a demostra di ta un berdadero patriota, para no solamente pa su negoshi pero pa Aruba su naturalesa, medio ambiente, turismo, y economia. Su dedicacion na conserva e beyesa natural di e isla y calidad di bida pa tur hende ta un recordatorio poderoso cu e no ta e enemigo den e historia aki - e ta e heroe. Den un saga marca pa evita y cambio di culpa, van Schaijk su compromiso ta briya como un ehempel di responsabilidad y liderazgo,” el a destaca.

Pa loke ta trata kico ta sigui awor pa dilanti, el a indica cu e perspectiva ta keda insegur mientras ta warda e decision di hues den e proximo simannan. El a resalta cu mediacion por provee ainda un oportunidad pa un acercamento colaborativo, pero e renuencia di e actornan clave pa participa den discusionnan honesto ta un obstaculo significativo.

Gomez a subraya cu Amsterdam Manor Beach Resort y partidonan afecta por spera solamente cu gobierno of AWSS eventualmente lo tuma propiedad di e problema en bes di push’e mas leu.

Por ultimo el a resalta cu eleccion parlamentario di dia 6 di december proximo ta agrega incertidumbre na e situacion delicado aki. “Con e administracion nobo lo ta? Ken lo forma e coalicion, y kico lo ta nan prioridannan? E preguntanan urgente aki probablemente lo tin impacto con e crisis aki ta ser maneha bay dilanti,” Gomez a enfatisa.

